

遂初草廬詩集

遂初草廬詩集卷三

海山集

琅槐杜 壻石樵著

過蘆溝橋

虹影跨神皋東流浪怒號川塗燕郡遠雲物海門高落日聞津鼓秋風點客袍長懷

恩遇重白髮已蕭騷

次臨洛關

南來日日走邯鄲秋色征人馬上看流水自緣平磧下夕陽不挂小峯端重門近扼山河壯列戍遙通郡國寬更喜闕衙瞻使

節豐年簫鼓有餘歡

是日居民賽神

還次臨洛關

前驅小隊入嚴關
校士陽平持節還
去日通宵聽白雨
來朝一路看青山
人疑炫服叢臺古
地壓黃河瓠子灣
野老不知今昔恨
桑麻雞犬自閑閑

雨渡洛河

小雨微兼雪輕寒
半挾風馬嘶洛水上
人過太行東鉅鹿懷前
績沙臺覓故宮
千年陵谷易煙樹
鎮濠濠

圓津菴後圃

老圃孤亭迴不羣
太行秋色與平分
松於簷角鳴虛籟
石向階前補片雲
滿院綠陰眞供養
下堂清磬小聲聞
沈吟擬續前賢句
繞樹嘯鴉日欲曛

寺爲方恪敏未遇時
養疴地壁間多舊題

試士日雪二首

天然文字本無塵
白戰何妨禁體新
銀海競搖雙管碧
玉臺別貯萬花春
梅飄絮舞翻成豔
露結煙霏總到眞
濯魄冰壺憑第取
風檐誰是過來人

羚羊挂角思無涯
彈指華嚴有幾家
豈爲刻雕方稱玉
不緣根蒂自成花
箇中元氣淋漓甚
空外傳神想像差
一點紅鑪能解

未且尋蘇老闢新茶

冬至後二日五鼓定州太守遣使遺冬筭率成答謝

重關魚鑰響鏐錚
刷雪裁雲入眼明
銀燭猶傳催夜漏
青袍忽憶餉春耕
尋常此腹容千畝
忖度前緣得幾生
細嚼冰霜參玉版
歸來不負寶山行

定州試院送家兄次屏弟星渚東歸用壁間韻

岩壑鎖院向雲開
小雪聯輿定武來
蘇子風流餘片石
蕭王遺蹟問荒臺
思鄉客背西山去
獻賦人迎北雁回
最憶危樓攜手處
上城陰塔影共徘徊

望都縣

城內有堯母陵

到來日月景猶新立國當年頌至仁喬木風煙終古在白雲雞犬萬家鄰入城山色長餘煖繞郭泉流總帶春百穀自豐人自壽祇疑擊壤有遺民

時已冬至後泉流不冰

塞上勸耕詞

鳴鳩鳴過春山紫耕人耕向長河尾犂犂确确十頃田前村後村鞭犢起卻說去年雪一尺覆地蝗種沒要卜今年雨三寸入土麥根活勸農使者冬方來車騎數里生塵埃手持勞酒勸爾飲努力官家租賦催不見扶蘇城下路至今猶有秦時灰

大風渡灤水

箕風動地軸長河西北來遠環老上庭直過單于臺白沙亘千里寒窟生黃埃洞浪入絕壑奔濤趨蓬萊鬱紆以澎湃觸岸如殷雷我行右北平四山何崔嵬未辨射虎石稍識白狼堆輿夫指縣壤云是古墨胎昔人不可作浩歌傷遠懷

曉發北平

綠樹村邊嘶紫騮白沙灘上閣扁舟山根礧磊地中出河水瀾漫天際流欲雨又晴垂大野薄寒將煖似初秋與人莫厭盤蛇路好景中間須更留

循灤河西至野雞坨

青蒼天氣接氤氲
渺渺漫漫路不分
一箇驛樓出崖角
幾家耕犢立河濱
林梢煙借蔥龍色
沙上風翻摺疊紋
雞犬前村忘遠近
回頭貪看兩山雲

大風發沙河驛

夜半風聲湧似潮
平明拗怒轉成驕
三春花柳無顏色
滿眼山川對寂寥
黃草坡邊人迹斷
紅泥坂上馬嘶遙
征夫未識艱難意
暗數郵程憶早朝

風雨看山歌灤州道上作

春雨洗山山欲青土毛石髮煙冥冥春風吹山山更活蔓壑枝
峯雲漠漠灤州風雨滿千山天公爲爾開春顏此意可愛不可
說乃在窈窕沖融間薄午風收雨又止肩輿終日山容裏看山
一步一回頭馬蹶泥沙鞭不起看山使人樂風雨使人愁行者
居者難爲伴直須面山長住看山樓

將踰灤境岡上有石林立

孤竹最西境高陟紅土岡羅列燦佳石夾道如羊腸昨來愛此
嶺念之不能忘今朝復登頓一一爲睇詳負險自奇崛踞危爭
軒昂欲行乃輒止將飛故未翔惜此英妙物棄擲委路旁似恐

礪牛角逕來牽人裳我欲載後車聊以充虛囊
蒂堅不可拔斧鑿還用傷安得初平鞭叱起成羣
羊驅歸米家園位置遠公房念茲造化工轉笑
不自量去去勿復道前山來青蒼

望盤山

馬上看山似剝蕉幾重行過影旋消忽逢黛色
三盤秀尙隔丹梯廿里遙憶昔載書陪後乘曾
因弭節陟崇椒雲扃一叩誠何幸稽首仙靈或
再邀

沙嶺用壁間韻呈仁圃年伯

萬善歸懷谷若虛諸公衮衮誦嘉譽門常候

蹕沾

天澤家有趨庭讀父書一室雁行賢並埒百年鳩祝慶還餘觀
風欲補陳荀傳政恐遭逢古未如

渡白河

黍谷寒原外漁陽古塞西長流環似帶繡壤劃成谿雨過沙猶
輭林遙渡欲迷白檀山下路終日聽鳩嘯

宿昌平卻寄兄次屏弟小泉

思緒紛紛不可刪明朝驛路又重關居人自數鶯花節旅客空
驚霜雪顏馬上春風歌出塞渡頭楊柳夢還山那堪一掬臨歧

淚更灑郵亭去住間

居庸關

十里望居庸摩天插碧峯劍函抽一一屏幅拚重重路失東西
向人忘前後蹤古來班定遠端合塞垣逢

上關

不鎖扉雙扇華夷自一家女牆緣嶺上戈壁截雲斜日氣峯頭
斂泉聲澗底譁春風等閒度山杏幾株花

官溝

履險若凌空茫茫亂石叢山銜太古日地拆不周風咫尺由天

通志卷之三
幸尋常見鬼工非緣乘傳過當與棄繻同

自岔道至土木驛

太古山川異經綸草昧存日寒春失色沙迴地無痕白草迷人
徑紅樓識堡門前朝遺戰壘恐有未招魂

八寶山之陽村落水田縈帶數里輿中得句至雞鳴驛乃
續成之

忽然魂夢落江鄉我有新吟境未忘十里蒼煙收不起千家喬
木榮成行山容帶日峯皆紫水色含春草亦香只恐雞鳴催促
去朝川詩畫兩茫茫

循桑乾至開平

早出雞鳴驛青山在馬頭隨山十面轉轉轉皆盈眸其中有平
土乃著桑乾流百折走東海晝夜何時休行人履嶺畔還復趨
巖陬但聞波濤響如欲挽萬牛北上鶴兒嶺石磴紆且修反出
衆山背迴瞰深谷幽前途竟何許一線不可求卻思列戍地盡
扼襟與喉冰天燭聲教奔走來氍裘自非持虎節安能事遠游
大矣

皇朝化山川畢懷柔觀風整俗使朔方行軒輶躑躅絕塞下何
以宣良猷

關溝行

前車後車不相續仰者僂轅俯脫輻前馬後馬不相屬上者踣
膝下踠足鈍或磊磊銳簇簇萬轉千迴往而復百步不得一步
熟一瞬而眩乃顛覆噫嘻危乎艱哉我思遠古之世茫茫昧昧
何所胚胎天柱折兮地軸摧但聞搖岡岌陵之衝飈崩崖轉壑
之犇雷虎豹潛伏龍蛇遠然後岢嶇突兀礱然而中開怪石何
嶢嶢連峯合沓縈煙嵐白日行天忽西匿纍纍星斗出其間重
巒直北三百里乃見單于牧馬白草黃沙田間君從此去何時
復來還昔日黑頭今華顛無爲久此彫朱顏嗚呼無爲久此彫

朱顏

贈張蔚州道渥

使君懷抱出風塵百里趨陪屢爲親
作宦不離山水地過關復見性
情人撐舁快論堪驚絕灑筆成圖
亦有神他日長安偕上計休辭枉
道卜詩鄰

開平試院對雨時撤棘將行

自看小吏束行裝雨灑殘春晚更涼
作意直須隨去馬有情聊爲洗征裳
鄉心寂寂臨芳樹煙景沈沈對畫廊
怪底滿垣螺黛好青山不似旅人忙

晚至沙城館人扃門而逸尉納焉且致夕飧

傳舍蕭然爨火虛皇華咨度意何如敢因口腹縻官廩自恐泥塗辱

簡書行道倭遲應媿我有戎幕夜不關渠殷勤寄謝沙城尉每飯難忘卽次餘

宿岔道城

海日懸西極天風落北門人來沙磧遠地擁塞雲屯禿樹雷燒久荒崖虎迹存山城聊復卧筆策叫黃昏

石佛寺東南轉地最狹峭壁百尺水流其間

石與水爭道人將焉避之轉丸方踏險鑿空乃登危發臂時相
引羊腸進屢疑桃源那得訪可惜好花時

隔水花開畧
瞬及之而已

還度居庸

金鷄破曉上征鞍一一奇峯倒轉看信有好書經百讀從來新
曲愛重彈迴頭但指雲橫塞投足應隨水下灘春色

皇州無遠近休將函谷論泥丸

過八達嶺
水流南下

懷柔道中

昔我經行麥始芽今來已是菜生花鶉鳩遷樹午聲煖蜩蜋繞
畦風影斜百日春光爲客過一川煙景向誰誇臨橋照見星星

鬢欲借南流送到家

題密雲館壁

東循紫塞問嚴關
城闕沖融杳靄閒
山色欲隨流水去
沙痕直際斷崖還
馬蹏芳草曾千里
鳥語垂楊又一灣
今夕暫留星使住
明朝依舊白雲閒

石匣至古北口望塞山

我行近塞山益奇
空中玲瓏開徑畦
綠楊道上一相望
淺深濃淡無不宜
轉行近前轉更隱
天門百尺凌丹梯
曲折歷盡始復現
疑以煙雨爲合離
桃花園裏紅千樹
畫屏當面忽屢屨
昨日

山雲今日否青天一一橫蛾眉仙閣秘閣殊恍惚敢擬飛步相
攀追從來畫工有粉本未識造化何所師秀靈磅礴無常想目
之所到形亦移興夫揮汗正如雨空青搖動吟詩脾安得吳淞
半江水爲我湔取凡庸辭

宿古北口徐秋潭提軍饋食

箭垛逼諸天關河坐渺然明燈千嶂外晚飯七星前險倚軍門
壯歡逢地主賢來朝更相憶詩寄落鴻邊

青石梁

戴斗見空桐延緣絕頂通千山失向背雨水自西東

白河石記

堯時日祠存漢代功

梁內外皆
關帝祠

年年

翠輿過不復類蠶叢

灤平道上觀山歌

北山龐博蘊德容南山峻削矜才峯中有澗水鳴琤琮對岸相望不相逢隨波流下前灘去兩影滌蕩歸神融俗士安知造物意妄生乖角區畦封首陽不隘柳下恭適於大道用其中君不見黃河天上水望洋貫注無窮已人間芥蒂何足言呂梁千丈平如砥

灤陽試士卽景

唱名忽白雨對案卽青山意得拈煙際情生點筆間煙雲吾自
賞詞賦爾誰嫺坐到斜陽露沈沈尙閉關

雨晴

雨晴窗易曉庭樹正嘯鴉是處生芳草無人掃落花衫痕中酒
摺履迹印苔斜門外銀袍立遙聽鼓報衙

小睡

小睡不移晷起來聞鳥聲桃花前日折春案一梢橫夢覺恬逾
穩寒過午漸輕徘徊念歸路猶及看山櫻

卽事二首

文書殊易了筆札未能忘硯滑教添水鑪溫指換香餘閑聽汗
漫新意出蒼茫忽覺三春遠褰簾花滿牆

兩山當戶暗一樹出檐明好鳥時喧寂閒雲似送迎鼻香花外
得眼纈鏡邊生

輦路經行處迢迢望

玉京

石路悉作冰紋

拾級上峻嶒前除待夙興胡然履平地乃是踏春冰苔點乾猶
滑泥花掃更增殷勤語多士著步自凌兢

後院桃花

試院幾株樹門深鎖寂寥東風一拋擲狂豔欲飄蕭流水自相
送鳴禽安可招我來悵遲暮空望武陵遙

灤陽書懷

失卻年光何處尋五更驚起擁重衾好花似雪堂堂去華髮如
霜冉冉侵入夏衣裳猶怯薄近山天氣易成陰思量底事關懷
甚濁酒無聊手自斟

窠雲篇

有序

關外曉行山腰皆白詫以雪問之輿夫曰窠雲也移一

時許則雲上天矣余行內地未嘗見之作窠雲篇

我聞山之出雲如擘絮又聞雲之行山如飛煙今之所見乃異
是岡巒屯積皚皚然四圍輕陰作水墨點綴烘鎖明光箋須臾
杲杲日出曉光凌魯縞欺吳綿初疑飛雪迴界嶺稍見成霞遙
上天雲兮雲兮勿戀山去作霖雨滋春田功成故巢當來還我
農禱祀無窮年

硯陽山房題壁

潑平居停
主人之居

山外青山樓外樓

前人句

邊城風景似中州千重綠樹連雲暗幾

折明河入塞流沙路雨晴長帶潤麥田煙煖欲成秋年豐野老

無餘事日枕西窗作臥游

葦水峪至王營

小住三家里高登百尺梁
衆峯齊臂指一水剗青蒼
谷轉疑無地坡遙更有莊
山花聊採撫十里自聞香

絕句

暫息塵中旆聊書塞上程
看山過九面依舊不分明

有感

手研丹墨自程書
跋燭常過二寸餘
筆札祇供貧俯仰
歲年幾與病乘除
溽沱夜雪催征騎
上塞春風走傳車
何日勞人知席

煖青山憐我我慚渠

宿長山峪大雨不寐

雷雨千山夜軒車塞上歸搖簾風燭動灑牖石泉飛蕭爽宜高
枕清深到薄幃遠聞灘瀨響入夢尙依稀

關城

已拚樽酒餞春華春去長安客憶家誰道漁陽春更晚關門五
月落楊花

于役塞上還題詩稿後

三春行住翠雲間應接曾無寸晷閒一箇奚囊收不得好詩畢

竟放還山

遂初草廬詩集卷三

海山集

古

遂初草廬詩集卷四

海山集

琅槐杜 堦石樵著

前湖晚望

直廬晚出

御園前馳道中分兩鏡圓荷葉菱絲纔冒水風漪雲縐欲搖天
幾叢人語芳林外一抹山痕夕照邊緩步歸來宵柝起疎櫺缺
月正南懸

醉歸吟

山公何所往潦倒習家池攔街齊拍手笑殺襄陽兒襄陽城中

遂初草廬詩集卷四

卷四

上

十萬家侵晨開門掃落花落花飛盡白日暮一夜愁心挂江樹

城隅

城隅一片月侵曉正茫茫寂歷聽更點逶迤度石梁東門闕雞
道南陌打毬場自昔豪華窟增人今古傷

七月廿七日假廣惠寺校士有作

晨入招提境靜聽芻尼喚豈意當叩鉢復爾事攜硯白雲遶榻
飛秋陰遂廊轉粥鼓午不聞經幢景方晏何事二三子名心干
萬變甯知世間法了如巖下電捨筏爾自登指月我不眩毋爲
微墨糾徒作筌蹄戀

題李愛堂春林歸翼續圖

飄飄征羽點柴門殘照東風河上村十載鄉關迷舊夢一回烽
火動驚魂祇應喚侶尋前約況是棲枝踏故痕我亦倦飛歸去
好可憐空作畫圖論

濟滑之亂濟甯土
盜暴起月餘乃靖

過密雲

歲晚惟衰柳天清見白沙河通京邑遠山繞塞垣斜亂阜羣堆
米長途曲盡蛇古來耕牧地閒數驛樓鴉

驅馬

驅馬看山去人行山亦行衝雲時轉折讓水忽分明突兀峯爭

通志卷之五
出逶迤阪自平鞭絲隨處指好是不知名

早行

愛此蒼山色尋常那得知雞聲三唱後客子獨行時濃黛圍天
小新陽出海遲惺忪拋夢去一種繫人思

贈別查簡菴宮允督餉秦中

中禁舊才賢旌麾擁妙年簪毫初罷講叱馭迴臨邊每憶書三
篋何心禾百廛借籌供驛使削牘議屯田他日懷京邑如余望
隴川鶯花韋曲路風雨灞陵天朝策能遺會秦聲早入燕
清時功業重休賦渭城篇

宋和亭小照

孰爲故我孰今吾柳帶荷裳聊可娛氣味得於彭澤近風光未
覺永和殊樽前鬪茗應思陸江上吹簫尙憶蘇爾許緇塵何處
浣眼中天地一遶廬

南至日出都

攤破五更眠雞聲候曉天初陽九衢路殘雪萬家煙馬踏寒冰
去春生落木前青山無限好依舊入吟鞭

將至涿州

危塔淩雲矗曉寒淺溪流水凍前灘人家處處團蕉屋一例圍

林雪後看

謁桓侯祠四首

龍戰何年事將軍有大名我行涿鹿野心憶錦官城慷慨今猶
古暗鳴死亦生里人長報賽惕息對檐楹

遇主艱難際安知運數移乾坤芳草昧江漢日流離割據天心
定西南王氣垂卧矛終有恨不殺阿瞞兒

傾膽留炎祚當時有幾人中原羣盜滿大義一朝伸忠難歸龍
角驅馳仗虎臣英風千載後日月尙如新

英雄長已矣祠宇古雲隈遠想搢傾廈真堪然死灰靈存白帝

下氣繞太行回風雨河山外停驂酌一杯

觀東坡雪浪石用元韻

衆春園裏春煙屯前石後石相雄尊得傍

離宮邀

品藻一洗厯劫塵埃昏前者疑眞後疑贋故迹殆類樓桑村卻
看位置還舊觀灑然風雨生雷門我來訪古重拂拭往事莽渺
愁吟魂太行恒山在眼底何時何地移雲根滹沱東流入溟海
橫波留此三兩痕欲探造物問眞宰東坡不起誰可論雨淋日
炙歲入百齋已非是况於盆叩之不言意惆悵嗚呼儻有斯人

存

大雪去定州仍用東坡雪浪石韻

鼓聲欲曙寒雲屯中山濁醪盡一尊雞鳴臺邊策馬去珠塵淨
掃煙霾昏春光幾日入林麓依然葉落淮南村棲鴉啄啄上枯
木亂翻玉屑鋪柴門有如梅花散香海撲觸鼻觀瑩神魂卻憶
坡公一拳石自言中有造化根安知事過人亦往春秋代謝都
無痕米家拜丈亦如此惜哉不與玉局論何如對景說豐稔高
歌聲和田家盆甬行百里始一舍可有春泥鴻爪存

正定使院元夕小飲是日大雪

坐客有談西湖者
故未用東坡詩語

去年來時雪馬蹏蹏踏寒冰裂今年雪又來樓頭晃漾春雲堆
玉沙鋪滿地鶩鷖飛上天溇沱一條赴銀海太行萬朵如渚蓮
常時偏愛雪作花少日復欣燈映霞鳳蠟光中看玉戲小紅萬
點春風華去年不似今年春今年猶是去年人賴爾裝作梅花
界洗卻年年衣上塵去日不可數來朝復何所華燈亦已殘白
雪還幾許一杯當屬水仙王前去譙門聽社鼓

感遇

常山來幾日芳草綠上階東風一相識百卉蘇根荄感此念吾
生歲月良有涯誰言室則邇而無笑語偕角弓亦何反晨星亦

何乖泣涕忽如雨明發尙共懷

少小趨庭日日侍嚴與慈小過卽譴呵鱗撻每隨之所以戒姑
息實恐履顛危諸兄亦已長幼弟始爲兒不識父母心嗟汝來
何遲奄忽歲月改諸兄復已衰顛覆孰爲扶危殆疇與持念茲
傷白髮沒世長銜悲

孩提脫襁褓粹質如玉瑩卵髮始就讀歲月互崢嶸中宵常惕
惕慮有瑕疵生貪泉甯可酌惡藥卒致萌安知微小處積善成
令名松楸恨鬱鬱傷哉今古情

讀書慕昔賢結念始束髮曾無適世才甘爲蓬蒿沒

王程迫遲暮矢將驚力竭十步九回頭尙憂懼顛蹶任大強負
荷不日亦不月所期一寸心詎勉補遺闕惡影而疾走何如就
陰歇憂來誰與語魂神自飛越

歲月苦不足憂思常有餘辛苦逢患難何德以當諸朝上太行
阪暮望渤海闊我馬顧不行且復立踟躇志大事多乖慮淺才
亦疏永言懷明哲脫簪返舊廬

自我別故鄉靡靡獨行邁常恐忝舊德冠屢敢忘戒禍福不虛
生慮適與之會將憂宗祀覆豈伊身名壞荒塗多荆榛日暮何
晦夔滔滔江漢波舟流奚所屆

芳蘭與蕭艾所託故不同汙泥一以染何以明寸衷皎皎古人
心不爲陋巷窮至今仰令德峻絕如恆嵩立身苦不早有初願
克終薰蕕共一器久久更相融可令男兒軀羞見麻中蓬

老至耄且及謀生計常拙人從故鄉來未語肝內熱披衣步廣
庭中懷自騷屑委身效馳驅敢云希高節念我同懷侶何以救
疎劣窮冬迫急景堅心厯霜雪芳春幸有時庶無改故轍

貧賤不自立富貴何所圖古人處憂患不以易歡娛末俗何草
草錐刀乃競趨安知壯士懷各有徑寸珠光華常自照肯爲塵
埃汙以茲厯苦辛適願皆坦途相彼夸毗子爲樂不斯須

朝陽出東海照見梓與桑中有先人廬一別十年強兄弟念我
歸少小相扶將但期聲名立不惜田園荒日月行衰晚顧瞻復
蒼黃悠悠浮雲際鴻雁始北翔對食拊案起無言自霑裳

小夫喜訾毀修士甯自全衆口之所集好月刻成癡况乃投以
隙聽者誰不然所以古君子不處嫌疑間良友諒且直翼之生
羽翰淫朋一不戒忽變青與丹吾黨少年人毋乃罹茲患忠厚
日以遠念之摧心肝

日歸復日歸倡予以和汝把耒畊故田採茆葺我宇春臬歲方
華秋月維徂暑援琴開南軒醺酒烹肥羜永念昔先人于時復

語語攜手上高堂相將敦古處寂寂百年內此意當誰與

題趙州牧許春山前輩田家樂卷子

太行西來浚水清使君飲馬田家行田家歲歲桑麻長皆言使
君如父兄使君自有田家樂卻面溪山背城郭興來命工寫作
圖夢魂不失南臺約螺女江頭沈曉煙郎官山下鳴春泉雞鳴
欲午牧牛出笑語似在羲黃前憶脫荷裳著錦衣廿年從宦每
言歸我道使君歸不得喁喁父老難重違卽今楊柳春風陌一
家散作萬家澤回首青雲多後塵空鑽故紙紆籌策君不見觀
風使者百無能筆舌雖存頭欲白

東城校射遂至柏林寺觀吳生畫水

命駕臨廣陌千騎疑雲屯獵獵飄大旗蕩起塵埃昏弓掣雙月
墮矢穿七札蹲閱盡好身手長風來天門言尋招提居稍探象
教根吳生有遺蹟半壁波濤痕化工若悅忽元氣相吐吞頓悟
身世理何異洪流奔迴看射的處餘迹了不存塔鈴向空語亦
足醒吾惛

至趙州廿餘日役竣感懷題壁

一月爲花作主人花開花落雨非真相逢榆社無今雨漫隔桃
源又幾塵流水三分春寂寞斜陽十日酒逡巡劇憐青粉牆西

柳向倚東風向故鄰

底事

年來底事更成癡
醉裏如忘夢後疑
一點春愁消不盡
夕陽天氣落花時

雨花巷用吳文簡公韻

三度來香國清詩誦
九華門空聊避俗
程迫已忘家
佛院鐘聲
午官橋柳絮斜欲行還且住
啜盡小團茶

文簡自署
九華山人

壁上看諸老聯吟擬鬪茶
碧添松徑窄黃繞菜畦斜
未息勞人

轍長閒衲子家蒲團時暗祝
彈指曼陀華

時小旱
望雨

是日宿栢鄉夜雨達旦更用前韻寄題菴壁

小憩逢僧話關懷渴憶茶雲根期汗漫夢隴睇橫斜幸乞霖三日過敷井萬家也知餅鉢水著地盡曇華

向夕春陰薄中宵掩月華夢魂縈客館喧笑起鄰家滴曉聲聲徹含煙縷縷斜誰尋初地去更淪雨前茶

內邱途中聞查簡菴同年病歿西安糧署

與君先後別金臺消息關心日幾回馬上驚聞魂欲斷太行風雨自西來

過圓津菴感方恪敏之事迴環疊元韻四首書付寺僧以

俟他日之重到也

放眼雲山歇馬遲
春風小徑雨晴時
僧寮問訊三生夢
禪榻追尋四壁詩
感遇幾增人歎息
同龕如見佛恩慈
菴有恪敏公祠
浮屠桑下能忘否
靜數茶煙影未移

郵程隔日境旋移
法澤新邀震旦慈

前一日過雨花菴至柏鄉夜雨達旦

花圃閒

行聊破俗草亭偶坐更成詩
千年菩薩猶生地百折英雄未遇時
捨筏何因登彼岸邯鄲塵海去遲遲

昔人一去世還移
俯仰浮生天地慈

余戊冬病殆復生

豈有因緣能證

果不離文字又論詩
落花嘯鳥紛前路
流水青山似舊時
解脫

自知關定慧爲嘗苦茗放杯遲

纔覺塵生覓帚遲維摩丈室暫留時重來已是三年約

亥冬一過此

往長懷七字詩車馬頻煩

王事重津梁示現佛心慈茫茫風雨關山道未解舟行岸自移
試日蚤起郡守未至三樂軒小坐

紅埃黯黯簇邢州小吏傳呼遞早籌人語仁喧雙戟外春寒猶
戀五更頭疎簾薄簾屏幃靜隱霧含風竹樹幽多少銀袍回首
看麗譙城上月如鉤

憶琴

南軒有懸琴文曰鐵珊瑚先人所寄意淵淵逮古初余時方總
角竊弄相盧胡但覺響離離鳴雁沙上呼甯知十年後斷絕一
絃無漆文橫側理珠徽黯金塗於今夢寐間有似追亡遺青瑣
復何在悄焉觀太虛

憶劍

先人有遺劍鹿盧三尺強歲久鐵花鏹七星猶生芒小時恒拂
拭幽意殊慨慷長年一去手遂與楚弓亡契舟如可求吾其塞
我裳悲哉延不津東流何茫茫

憶書

家世無長物所傳但遺經辭家二十載散落如殘星自昔少年
日朝夕聞過庭還齋抱書讀蘭膏夜熒熒愚盲不終世詎非故
紙靈何意一朝棄視之等漂萍我欲收遺卷芸香千萬齡嗟嗟
文字內未乏枯死螢

書懷

十年握粟卜故絮曾無溫筮之云甘節亦願亨我屯馳驅從王
事不敢顧私恩以茲抱微尚反爲訾讐根蚤夜未暇息往往驚
營魂疾行無好步但求真意存孤懷安所託欲言聲已吞

蒲柳生沮澤託根本來薄寂寞日月往榮華竟銷落一憶秋風

生心危志亦削頭者春陽至白日照幽壑死喪不知戚生全復
何樂慚負天地仁萬物共一廊答報未敢云微衷時躍躍

北郊閤馬射遇雨

珣勒鐵連錢春郊試鼓弦綠圍三月雨白壓半城煙破的長亭
外吹笳細柳邊時平不忘武好頌屢豐年

雨中訪鴛水亭

志稱一邑游觀之
勝今惟空亭存

鴛水橋西鴛水亭無邊煙雨畫冥冥來看麥隴成方郢幸假雲
山作畫屏細草全迷村徑碧垂楊長抱郭門青當年勝事今何
有獨憶連州陋室銘

送春

綠楊門外繫青驄
昔昔情懷又不同
一院落花三月雨
數聲曉鳥五更風
城頭筆簌驚芳枕
江上琵琶隱玉龔
迴首當時歌舞地
酒人拋擲太匆匆

將之武陽

客裏光陰九十違
留春無計送春歸
微風驛路楊花落
細雨山城燕子飛
望遠幾回停倦馬
經年猶自著征衣
黃梁未熟邯鄲過
只恐還家夢亦稀

五月四日校射

天雄舊鎮古城西
細草如氈視馬蹏
十隊健兒旗角轉
一行飛鏃鼓聲齊
雲垂仗外禾連隴
塵歷河干柳半隄
父老來觀時暗憶
三年曾此聽征鼙

滑縣之亂大學士
托統防兵駐此

余以丙子冬出都門
人徐庶常銑病數月
遽歿丁丑冬還寓
檢故簾得庶常乞書
之紙愴然有作因書
之將以貽其子

天地搏萬物而復離
散之同是百年客云
胡千歲期四十汝方
壯五十我已衰衰謝
壯當存而我復在斯
自汝游我門相將登
玉墀謂汝頗挺出洋
洋富文辭曉夕數相
見隔面始一葦歸來

檢故篋徬徨然且疑一紙落我手雙涕爲汝垂云古死生大今也獨何爲電光與石火安能灼靈龜我欲寫此紙因之大江湄絮絮語來者未知來者誰

浣花女史畫蘭

杜陵詩老今何在女史猶然號浣花一寸芳心千載思美人香草共天涯

陳石士以所作石鈔箋十幅見貽并示以詩依韻和之

石鈔猶鐫元祐字蘇齋風月畫中寬爲因睡起一甌足卻破春來十日寒折腳重摹苔暈古澄心初拭墨痕乾宜君挂腹文千

軸付與阿蒙苦未安

美人觀書畫幅

側側輕寒掠鬢鴉
手添春水浸梅花
閒翻幾頁陳王賦
又逐東風入若邪

遂初草廬詩集卷五

海山集

琅槐杜 堦石樵著

問渡

問渡燕郊去風聲沙岸頭浮雲連紫塞旭日亂春流土齧將穿
石橋編不繫舟守臣懷利濟何以贊良謀

別山

薊州南
三十里

西去與山別東來與山逢去來自朝暮蛾綠爲誰容

北平試院三松堂後最大者一株風摧臥地根半出土矣
擎空如故戲呼之臥龍而系以詩

東門北角平山頂挂月篩雲臥短窗夜半風來忽驚起欲隨雷
雨化春江

手摩鱗甲將髯鬚洒墨松江劇可呼捲地風濤繩榻畔雙難銀
燭看官書

到北平十餘日大風揚塵望山不見

後苑看山不見山歸來長被蓋頭眠泥他枕簟松風夢數過清
明柳絮天頻爲澆塵勤祝雨未妨添翠淡籠煙眼中得飽甯能
幾也只生平此愛偏

風止見山喜而有作

十日塵霾靜掩關城頭忽報出青山疑從沙海蒼茫際徑落煙
村窈窕間躡屐幾曾勞悵望賞心何必定躋攀從今與汝爲賓
主不盡三春不擬還

晤葉芸潭觀察問故人消息

君來幾日別長安乞與行滕日記看若箇衝風傷墜蒂何人橫
海厲飛翰金門對策英年好仙嶠留題醉墨殘莫怪升沈俄頃
事九還轉盡古今難

時大考翰詹
多改官者

盧龍春夜

雨絲煙柳盼清明幾度平山頂上行一枕松濤霜兩鬢半牀詩

卷月三更東風草綠雲連塞北斗星高水抱城何處圓蘆弄羌
管無端喚起玉關情

春晚

老盡鶯花南北枝自憐疎懶下階遲燕如再噉成何味蠶已重
緘尚有絲應客怕逢中酒後懷人愁見上燈時唾壺如意當年
恨只算潘郎綠鬢知

齊廟

兩水一灤水一
青龍河也

連山西北驚雨水東南流俯仰極千里今古同一邱悲歌及黃
農抗節懷商周斯人顧遐逝大道日沈浮叢祠儼冠帶萬禩輕

王侯豈無蘭鞠薦，尙恐薇蕨羞。念茲三歎息，天地良悠悠。

使院後山偕風航石莊曉峯共話兼呈中亭

尋常掃徑避塵埃，不覺東風長舊苔。別院鳥聲招客去，經時柳
眼向人開。山橫塞上堪梯否？水繞城陰勝渡纔。如此春光如此
地，杖藜那厭百回來。

喜雨起語特翻東坡意而用之

東風知我看山情，吹送檐前春雨聲。急打窗櫺和夢覺，潤滋野
草爲身輕。幾番揜箔臨階立，便欲衝泥蹋屐行。明日四圍濃黛
裏，有人跋馬勸深耕。

雨後看山作

米氏家傳水墨圖天然烘鎖半模糊山村欲曉林霏重擬着千
言一字無

強飯

今朝得春雨老夫忽強飯未識何相關而有助下嚥自我來北
平邊沙日打面出門不十步瞑目欲顛眩一洗心魂清頓覺胃
腸變乃知天意厚卻與人事券昨夜文書了深更枕席戀謂是
當插筆豈意復洗硯三月柳色柔萬家春鳥嘯水添活活流山
潑的的荷對此不成吟亦恐化工倦忽然舌本翻似隨雨珠潑

呼童臨前除傳聲更式燕

適太守任湘
晚前輩饋食

盧龍雨後觀山水放歌

水氣不在水山光不在山譬如詩人愛山水詩成攔筆心依然
後世讀詩兼愛人彷彿水之煙態山之嵐搖溶牽曳無定在干
里捲入胷懷間我欲放眼浩渺之江上又欲振衣縹緲之峯巔
橫風遮空不能到吹夢乃落盧龍邊盧龍有山亦有水春雨灑
戶驚晝眠揭來後園一騁望但見長瀾疊嶂沐浴爭娟妍裊裊
行雲寫不得執管欲下心慙焉嗚呼造化之工乃如是詩人之
筆誰爲傳世不有坡公與米老空令佳句飄泊隨風煙

登高望遠書事五首

好雨發春容草木滄餘靄流雲日夕佳青山久相待頗傷行役
客一粟渺滄海烏鵲西南飛故人誰好在

城邊楊柳陌山下桃李蹊異鄉美風日令我歸路迷斜陽正晚
晚雲氣生虹霓長安獨不見心與亂峯西

故鄉在何許千里生春草重山何莽莽是向渝關道渝關幾時
還及此春風好努力把鋤犁歲寒期共保

悵望遠山岑凝睇淥水濱東皋農事動鳥鳴驚四鄰徘徊上古
戍驛騎追紅塵相看不相識嗟爾太古民

意長日月短躍龍不相借游氛漸泱泱餘陰翳桑柘夙興候明
晨勞生自悲咤焰焰雙紅燭寂寞山堂夜

留題孤竹山堂

統如樓鼓對斜暉行笥重翻換袷衣山色繞垣隨馬去鳥聲隔
戶送人歸曹騰暗覺春風老慷慨空驚壯志違明日儻尋遼海
夢綠楊城郭又依稀

松下翫月

曳杖看孤松舉頭見明月愛此白玉盤挂彼青蚪鬣娟娟瀟灑
姿離離玲瓏葉跳蟾影欲出顧兔寒應絕良夜每淒清芳春自

光悅誰能千里來獨與一朝別

登清風臺

命駕出盧龍拏舟弔孤竹宛宛首陽山灩江緣其足山夷江無
波清飈振林木偃僂謁古聖心神爲之肅高臺何崔巍複道

離宮屬今年

萬乘來鳴鑾響空谷緣知前聖心更邀

今聖燭侯國乃故里靈雨豐年卜定可惠遺黎豈但激頽俗扶
持一登陟日旰前旌促行行且默祈出門萬山綠

遷安道中

春樹繞春煙桑田間麥田
山舍人影小沙印馬蹏圓
落日明孤戍繁花暗遠天
定知今夜宿身寄畫圖邊

沙河驛行館

幽鳥囀清曉聞階墜落花
此行春事了小住爲山家

過齊家嶺

春山佳處足淹留可奈征塵簇馬頭
卜宅南邨能見與不妨長似落帆舟

追憶不已復成二首

山屏轉摺看三面花塢迷離有萬重
見說桃源今尙在漁舟何

事不重逢

西家花落東家雨一院泉流兩院風若使結莠來共隱也應雞犬似新豐

山村

底處漁郎可問津日高門巷不逢人青山影裏桃花發一閉仙源又幾春

別山

昔來與山逢今去與山別娟娟態如故行人自癡絕

翠屏山下

魚鱗田畔草萋萋遠近雲巒望欲迷一道明河林杪去行人趨
過翠屏西

旅思

結習前生總未忘酒痕檢點舊衣裳輪蹄不爲拋愁駐筆硯偏
因寫恨忙燕子樓臺驚客夢梨花風雨斷人腸三春去盡無消
息回首邊城正夕陽

雨出薊州

雲深煙白衆峯頭淡冶山容不可求去日風沙來日雨一春前
爲看山愁

書事

蒼煙滿墟落晨光始熹微牛犁出南畝父老騎荆扉共道三月
旱麥苗瘠不肥夜來陰正好未明已復稀十日不作雨百口當
何依停車語父老勿徒自苦爲

天子念爾勞一飯不忘饑豐年爲爾禱靈膏爲爾祈黑雲起東
海行將及郊圻不見遠林外團團鵲井飛爾盍聚族謀無失耒
耜期未雨先耘耨聞之古耕師望歲意良苦惜農安可希涓俗
獲美報天心固不違我是採風使持以報

彤闕

出關

太白宵看上戍樓前朝耕戰幾時休而今萬里無兵氣惟見長河抱塞流

榆林驛

三年一過榆林驛異地重經亦較親日色遠明天際雪風痕微逗水邊春巢梁語燕來窺客倚戶垂陽宛蓋隣候吏出迎還記否青山如故白頭新

八寶山

八寶山前春水平短輿迤邐田間行稻秧未出蘆芽短日午閣

閣聞蛙鳴居人不識居山樂詩情百種終無著春風一段小江南
馬策前頭款飛落

雞鳴山短歌

飲馬下白登揮轡出開平每有早行人至此聞雞鳴
嶺黯黯沙城戍亦有投止客夜聽雞鳴去雞鳴星始稀寒霜拂
人衣關河不可極游子常懷悲雞鳴天下曉西風吹白草行路
古今難人共沙場老

早至響水鋪

大風刷沙石激水疾走桑乾三十里沈沈白日上東峯山村人

家臥不起村前雷轂響奔溝山下風吹萬木號莫春三月尙如此何况霜天縮蜎毛曾冰積雪陰山路多少塞鴻飛不度君看秦漢戍邊人弓刀悄背臨洮去

宣府學官爲余言北去邊牆三十里耳因書絕句

昔聞遷客渡桑乾卻把并州故國看更有龍沙天萬里任他風雪路漫漫

與星渚弟食榆莢

榆莢初成以麥麴和糖蒸食余幼嘗嗜焉宣府使院復命作之旣而弟檢帝京景物畧曰榆錢糕也

纍纍榆星不在天東風拋擲俱青錢夜來細雨灑官閣柔枝淨
洗新娟娟呼童採擷入筐籠爭拭釜餽羅几筵邊方苦無櫻筍
配欲將杞菊滌腥羶小時聚栗有同好單衫總角情依然柳枝
搖搖杏花冷社日過後清明前芳香染指甘在口此語已隔四
十年當時風味今何似祇恐魚兔忘躡筌我聞榆林人最壽得
非食料同飛仙郭曉種樹要種此東臯尙有數畝田他時山村
供下箸作雪揉露和風煙晚窗得飽還隸事帝京一夢題糕篇

初夏

文書盡日掩重閣綠樹侵階草漸肥幾度轆轤隣井轉一雙蝴蝶

蜨過牆飛重簾向午風聲碎疊岫浮空黛影微閒憶大羅天上
事辦香消受到斜暉

睡起

篆香裊裊息綿綿醉裏乾坤小謫仙樹影漸移軒檻外鳥聲只
在枕函前飄風作陣催花落細浪如竿待茗煎睡起卻開湘箔
望萬峯城上碧連天

蟻陣

一氣相感噓衆形自邂逅豈伊蠻觸疆樂此水火鬪初如雲出
山漸乃泉赴溜磨牙銳吻接攢股短腳湊不聞戰伐聲誰知罅

瑕構緣以結不解徒滋辨者囿或云雨之徵斯言農則候日來
靈膏灑未見覩土透將毋蒸柱礎因之啟華竇豕涉快詠詩龜
圻亟占繇挽河先洗兵垂海更弭寇明晨四牡行延眺九野秀
讀宣志居人於清明中元冬朔婦子相向哭於門外蓋前
明百戰之後徵戍者衆喪亡亦多故沿之成俗也心爲
怆怆作歌告後

嗟爾宣人哭何哀黯黯門外吹寒灰歎爾宣人泣何苦寂寂門
前溜秋雨東家消息西家信人言不及不敢問朝登古戍占星
芒夜向高關看月暈不言自覺心骨悲相對如何不淚垂男兒

零落隨百草眼中唯見紙錢飛吁嗟乎秦皇漢武間代起長策
開邊意未已自誇壯士定天山豈見殘兵哭遼水更經喪亂數
前朝軍帖僉丁歲歲挑生離吞聲不得語死別孤魂何處招至
今時節沿成風上墓不與關內同太平歷世猶未改何況朝煙
與暮烽少年荷耒老驅犢努力公家無不足如此遺黎觸易悲
殷勤爲語邦之牧

喜雨 時京師旱

見說迎梅又送梅如期誰遣殿春來檐看雲腳天何處樹驗風
頭日幾回大澤端應流鳳咮歡聲直欲過龍堆煙濃泥滑關山

夜點筆吟成蠟炬灰

聞布穀

布穀布穀來何遲此是江南二月時
陌上花開風片片村前草綠雨絲絲
高眠塞上芳菲晚日日塵沙簾不捲
一聲喚起曉耕人年華好在林邱遠

使院題壁

五更鼓角驛程催馬上垂鞭首重回
深院無人芳樹綠閒窗有月夜烏來
登高不少風雲思弔古難逢匡濟才
贏得書囊談未了一生石硯伴松煤

紫石坡

五月羊腸車轆轤左倚高岸右深谷尺地之外非我屬元猿倒
挂鶴俯啄向前十里就平地迴頭欲將來處記目力所窮足不
至上有神鐫太古字

土木謁顯忠祠詠古六首

豎子安知戰鑾輿底太輕隻輪曾不返大廈忽成傾碧血已塵
土青山猶哭聲同心如少保遺恨莽難平

六句用少陵
亦適與事會

良臣衛社稷軍出夜倉皇無力迴天步甘心作國殤先朝所培
植一旦付淪亡大漠歸來日曾無弔戰場

參肉其足食還聞肖像祠將毋南內夜不念北庭時易世終難
寤孤忠孰與期乾坤能再造幸也亦何辭

謝使猶餘壘還鄉故有河不緣忠武力其奈靖康何與爾空名
挾撐余半壁多弓藏高鳥盡灑淚看沈戈

朝廷堪幾誤不用徒薪謀叩馬徒充耳登陴乃借籌一身甯自
惜多難且殷憂此舉名何在長城壞卽休

成敗皆同沒蒼茫舊迹沈風雲猶變色天地復何心山勢迴關
右河流傍隴陰悲歌戎馬後短髮落遺簪

度懷來沙磧至岔道

空桐上與北斗直鴻濛氣湧萬峰出長河落地走東海下見水
平四千尺蚩尤所都禹不到界疆要自洪荒闢文字未與中原
通唯見東西轉白日來牛去馬那計年蹋碎媧皇補天石南風
四月吹黃沙誰歟久行去其家前行過去後行續連車似引常
山蛇乍可光輝照行路吹角邊城煙景暮沈沈虎豹立九關絕
巘當空君且住

過八達嶺

詰屈一徑通突兀萬峯會以此詫鄉人來從飛鳥外

五日憩九松山僧舍用研露司寇韻

奉使三年憶舊蹤初來佛院洗塵容遙思驛路逾千里默數雲
龕第幾峰記節猶存懸戶艾納涼恰見出檐松茶甌放卻匆匆
去辜負登山七尺筇

灤平行館疊題壁韻仍用前人句起

山外青山樓外樓行人說是古興州天撐鼇極三韓盡水帶龍
庭萬壑流此日林檎皆近

御行宮在縣西當年士馬鎮防秋欣看侯尉無中外擁節書生紀壯
游

雙塔山歌 在灤平東北二十里

望帝化爲鳥望夫化爲石雙筍迴立撐青空始有茲峯自何日
疑是忠貞之魂之所化萬古森然數百尺人間紀載顧寥寥鬼
斧神工誰可識我不見太華仙人蹤亦不見秣陵燕子迹絜高
量大恐未然峭絕攀緣奇則一世人只說兩浮圖唯見日月通
光煙雨失噫嘻乎造物豈以駭衆目故遣孤翹峙山脊而又寘
諸古塞間得望爲幸那能卽嗚呼斯意我知之乾坤恍惚端倪
出淩摩清影照灤江耿耿元精此其式

過紅石梁南望諸山

谷中觀山如面壁眼光尋丈僅抵尺的盧一躍登高梁萬壑千

巖拔地出直看不辨幾重深遠者憑陵近拱揖坐井只言向無
有適從何來乃遽集惜哉險徑不可留畫障滿前倏復失前村
麥熟布穀鳴一聲叫破蒼煙色

古北口詠古

雁磧龍沙昔建庭欲將天塹劃青冥前朝一爲長城誤十萬春
山掩畫屏

還過九松山疊前韻

旋生後迹滅前蹤未覺今顏異昔容市月再來蕭爽地周天都
插妙高峯偶停倦轡因思茗小倚疏寮爲看松身到上方應更

好幾時一試撥雲筇